

# Malegiar cun puorla da crap

## Cuors da malegiar frescos a Vuorz

■ (anr/abc) **Vendergis e sonda ei ina pintga grupp da personas interessadas separticipada a Vuorz ad in cuors da malegiar. Buc in usitau da malegiar cun ieli ni aquarels. Ils participonts han fatg ina fresca, sco antruras il Meister da Vuorz.** El Grischun s'auda el tiels pli enconuschents picturs. Buc Alois Carigiet, era buc in dils Giacometti, ed era buca Hans Ardüser. Quei pictur artist ha vivju aunc avon. El 14avel tschentaner ha il Meister da Vuorz decorau numerusas capluttas, baselgias e castials en Rezia. Co el senumna propi san ins buc. Ins enconuscha sias ovras da siu stil particular, veser quellas san ins a Clugin en Val Schons, ella baselgia da sogn Gieri a Razén, ella caplutta da s. Maria Madleina a Dusch en Tumliasca, ella catedrala da Cuera, el casti Brandis a Maiavilla, ellas

baselgias da Pitasch e Schlans ha el medemamein luvrau avon gleiti 700 onns.

E naturalmein a Vuorz nua ch'ins sa admirar sias pli bialas ovras d'art. Perquei han ins attribuiu ad el il num d'artist «Meister da Vuorz». Igl ei ovras ch'ei aschi renomadas sco quellas ella baselgia da s. Martin a Ziraun. Co quei pictur ha malegiu san ins era. Igl ei la tecnica ch'ins numna «fresco». Il maletg vegn fatgs sin ina maula bletscha, e per far el drovan ins colurs da crap.

Vendergis e sonda ha la restauratura d'art *Brigitte Bütikofer* menau ell'Uclivetta a Vuorz in cuors da far in fresco. L'uniun «Luvratori Meister da Vuorz» ha organisau l'introduziun ella tecnica da malegiar fresco. Ils sis participonts han empiru da far sezs l'entira procedura ch'ei drova, naven dil turschar la maula to-

chen tiel preparar ils pigments dallas colurs. La specialista ha mussau la differenza denter pictura murala e pictura da fresco culla puorla minerala. Frescos pretendan in maun segir e spert, pertgei il pen nel streha ils pigments da colur sin ina surfatscha da maula bletscha. La procedura da schigiar garantescha silsunter in'ovra che mantegn las vivas colurs naven digl ocher, igl azurit blau, il tgeitschen zinner e cumbinaziuns d'iom tochen tier la puorla cun pigments da malachit e sablun clarbrin. Treis students dalla Scol'aula per economia e turissem HTW a Cuera han filmau e documentau ils process da lavur da quei cuors.

**Uonn porscha il «Luvratori Meister da Vuorz» aunc treis fins d'jamna a Vuorz cul cuors da fresco. Interessents san s'annunziar direct tier [www.waltensburger.ch](http://www.waltensburger.ch)**



**Brigitte Bütikofer muossa a dus participonts co strihar ora la colur minerala. FOTO A. BEELI**